

# 20,000 akan sambut ketibaan PM di Kedah

ALOR SETAR, Isnin — Sebuah sajak khas yang mengisahkan sejarah perjuangan Datuk Seri Dr. Mahathir Mohamad akan dideklamasikan Jumaat ini dalam acara menyambut lawatan Perdana Menteri di Stadium Darulaman di sini.

Datuk Seri Dr. Mahathir dan Datin Seri Dr. Siti Hasmah yang mengadakan lawatan dua hari ke Kedah akan diberi sambutan berwarna warni di stadium tersebut.

Antara acara yang disusun termasuk menaiki gajah mengelilingi stadium dan memeriksa perbarisan 1,000 orang ahli parti-parti politik dan sukarela.

## Deklamasi

Menurut pengerusi perhimpunan dan perbarisan majlis sambutan meraikan perlantikan Datuk Seri Dr. Mahathir sebagai Perdana Menteri, Encik Zainal Abidin Johari, hampir 20,000 orang terdiri dari berbagai lapisan rakyat akan menyertai perhimpunan di stadium itu.

Perdana Menteri dan Datin Seri Dr. Siti Hasmah akan tiba di Stadium Darulaman dengan sebuah helikopter Nuri Tentera Udara Diraja Malaysia jam 9.30 pagi.

Datuk Seri Syed Nahar Dan Datin Seri Nik Maimunah akan mengalungkan bunga bertih kepada Datuk Seri Dr. Mahathir dan Datin Seri Siti Hasmah sebelum pemimpin-pemimpin wanita melakukan upacara menepung tawar.

Seribu lima ratus orang kanak-kanak sekolah akan menunjukkan senaman ramai sebaik saja 2,500 orang rakan mereka selesai mengadakan persembahan kad selmbas.